



გამოჩენილ მეცნიერსა და საზოგადო მოღვაწეს საქართველოს ს/მ მეცნიერებათა აკადემიის აკადემიკოსს, საერთაშორისო სამეცნიერო ჟურნალ „ეკონომიკის“ სარედაქციო კოლეგიის წევრს ბატონ **პაატა კოლუაშვილს** 2016 წლის 5 სექტემბერს 60 წელი შეუსრულდა.

ბატონ პაატას გამქვეყნებული აქვს 250-ზე მეტი სამეცნიერო შრომა და სტატია, 5 სახელმძღვანელო და 8 მონოგრაფია. მისი სამეცნიერო მოღვაწეობის სფეროა აგროეკონომიკური, სასურსათო უსაფრთხოების, სასოფლო-სამეურნეო კოოპერაციის, მიწისა და სოფლის განვითარების პოლიტიკის პრობლემები.

ბატონი პაატა არის აკაკი წერეთლის პრემიის ლაურეატი (1995წ.), რომელიც მას საზოგადებრივი მოღვაწეობისთვის მიენიჭა, ხოლო ს/მ მეცნიერებათა აკადემიის გადაწყვეტილებით მიენიჭა 2014 წლის საუკეთესო მეცნიერის ნოდება აგრარული სფეროს ეკონომიკის დარგში.

ბატონ პაატას, როგორც საქართველოს უზენასი საბჭოსა და საქართველოს პარლამენტის წევრს, ხელი აქვს მოწერილი საქართველოს დამოუკიდებლობის აღდგენის აქტზე (1991წ.) და საქართველოს კონსტიტუციაზე (1995 წ.).

ჟურნალ „ეკონომიკის“ რედაქცია ულოცავს ბატონ პაატა კოლუაშვილს 60 წლის იუბილეს, უსურვებს დიდხანს სიცოცხლესა და ქვეყნისთვის მისთვის დამახასიათებელი ნაყოფიერი მოღვაწეობის გაგრძელებას.

ჟურნალ „ეკონომიკის“ რედაქცია

აქვე გთავაზობთ ბატონ პაატა კოლუაშვილის სტატიას, რომელიც ქვეყნისთვის საჭირობოროტო თემას ეხება

ქართული სოფელი მარადიულია

პაატა კოლუაშვილი

საქართველოს ს/მ მეცნიერებათა
აკადემიის ნამდვილი წევრი

„ჩვენებური გლეხი ბინადარი კაცია, საცა დაბადებულა, იქ მკვიდრად ფეხ-მოკიდებულია და ღრმად ფესვგადგმული. იგი თავის მამა-პაპეულ ბინაზედ დამოკიდებულია მარტო საეკონომიო ანგარიშით კი არა, არამედ სულითაც და გულითაც, ესე იგი ზნეობითაც შემსჭვალულია. მისი სოფელი სამკვიდროა, თვითონ „მკვიდრია“ თავის სოფლისა და სხვა თავ-მოსაწონებელი სახელი არ იცის“.

ილია ჭავჭავაძე

რეზიუმე

სტატიაში ავტორი ნათელყოფს, რომ ქართული სოფელი, „მცირე, მაგრამ ჩამოყალიბებული ერთ-ერთი ცივილიზაციის“ (აკად. ნიკო მარი)-ქართული ყოფიერების ორგანული ნაწილია, მარადიული ღირებულებითი მთლიანობაა, სავსებით გარკვეული ეკონომიკური, სოციალური, გეოგრაფიული, პოლიტოლოგიური და იურიდიული ცნებაა; სოფელს თავისი არსებობისა და ფუნქციონირების ობიექტურად შემეცნებადი კანონები აქვს, მას თანამედროვე საზოგადოებაშიც და განჭვრეტად მომავალშიც თავისი ჩაუნაცვლებადი როლი და ფუნქცია გააჩნია.

ავტორი მკაფიოდ ასაბუთებს, რომ ცნობიერებისა და ყოფიერების პერიფერიაზე სოფლის „განდევნა“, მისი ღირებულებითი დამცრობა, რუდიმენტად ანდა ბალასტად წარმოდგენა, გონებრივი დაღტონიზმია; ხოლო ყალბი სოციალურ-ეკონომიკური მიზანშეწონილობით მისი განირვა, ბედის ინაბარად მიტოვება ანდა ბაზრის სტიქიისათვის მინდობა - შეუწყნარებელი დანაშაული.ავ-

ტორი ნათლად აჩვენებს, რომ ადამიანებისათვის დამახასიათებელი ე.წ. შიდა-ჯგუფების (in-groups) ანუ ჩვენ-ჯგუფების (we-groups) რიცხვში „თანასოფლელთა“ სახით უაღრესად ღირებული, სიტბოს გამომცემი „შინაურობის“ კერა ღვივის, რომლის იგნორირება ანდა უარესი - მის წინააღმდეგ გალაშქრება თვალსაჩინო ბოროტებაა; გარდა ამ ღირებულებითი ასპექტისა, ავტორი წარმოაჩენს სოფლის დღევანდელი და მომავალი ფუნქციობის უეჭველ ფაქტებს, როგორებიცაა: თანასოფლელების მიერ საკუთარი გარემოსა და ბუნებრივი რესურსების უკეთესი ცოდნა, საკუთარ მიწაზე მკვიდრობისა და თავიანთი სამკვიდროს მოვლა-პატრონობის ნებისმიერ სხვა სოციალურ ჯგუფთან შედარებით უპირატესი განცდა, რის შედეგადაც აშკარა ხდება, რომ სოფლის მოსახლეობა თანამედროვე ქვეყანაში ის ერთადერთი თვითკმარი სოციალური ფენაა, რომელიც განსაკუთრებულად არის განსახლების ტერიტორიასთან მისი მოვლა-პატრონობის უფლება-ვალდებულებებით „მიჯაჭვული“ და ამდენად, ქვეყნის ეროვნულ-ტერიტორიული იდენტობის განმსაზღვრელი ხერხემალია.

აქედან გამომდინარე, სტატიის დასკვნით ნაწილში ავტორის მიერ ნაჩვენებია ის ეგზისტენციური საფრთხე, რაც სოფლისა და მისი მოსახლეობის როლის არასწორად შეფასებისა და გამომდინარე, არასწორი პოლიტიკის შედეგად სოფლის მოსახლეობისგან დაცლას, სამკვიდროსაგან მათ აყრასა და „პროლეტარიზაციას“ შეიძლება მოჰყვეს.

საკვანძო სიტყვები: სოფელი, გლეხკაცი, სოფლის მკვიდრი, სოფლის მეურნეობა, განვითარება, სახელმწიფო, მოვალეობა.

ძირითადი ნაწილი

ისტორიულად საქართველო მსოფლიოს პროვინცია არ იყო. იგი იყო თვითმდგომი, სხვა ყველასაგან გამოყოფილი და განსხვავებული ერი და სახელმწიფო, რომელიც თვითონ ზრუნავდა თავის დაცვასა და მოვლაზე და, შესაბამისად, თვითონ საზღვრავდა თავის ე.წ. ღირებულებათა სისტემასა და შკალას, თავისი მორალის, თავისი სოციალური ურთიერთობებისა და პირადი ურთიერთობების წესებს. საქართველო იყო „მცირე, მაგრამ ჩამოყალიბებული ერთ-ერთი ცივილიზაცია“ (მეცნიერული ქართველოლოგიის

ერთ-ერთი ჩამომყალიბებლის, აკად. ნიკო მარის, ეროვნებით ქართველის, სიტყვებია) სხვა დიდ და მცირე ცივილიზაციათა შორის.

ქართველი ერის მენტალიტეტი, ისტორიულად, დემოკრატიულია. ისტორიულად საქართველო სრულყოფილად ფეოდალური ქვეყანაა, რომელიც თავისი დამოუკიდებელი არსებობის ბოლო რამდენიმე საუკუნის მანძილზე (რუსეთის მიერ ანექსიამდე. 1801) ქანაობდა სიკვდილ-სიცოცხლის ზღვარზე თავის მეზობელ მუსლიმურ იმპერიებთან ბრძოლაში (ფეოდალიზმი, როგორც ცნობილია, შუა საუკუნეთა დემოკრატიაა. საქართველოს დიდი მეზობლები – თურქეთი, ირანი და რუსეთი, მანამდე – ბიზანტია² კი, პირიქით, დესპოტიები იყვნენ). საქართველოს ერთმა მეოთხედმა – მთამ – ისტორიის ათასწლეულები ე.წ. სამხედრო დემოკრატიის (თემობის) პირობებში გაიარა.¹

ქართველები სამინათმოქმედო ცივილიზაციის შექმნის სათავეში იდგნენ და მინათმოქმედება მათთვის არა მხოლოდ უზრალო სამეურნეო საქმიანობა, არამედ ერთგვარი ღვთისმსახურება იყო.² ჩვენი წარსული და მომავალი განპირობებული და გაშინაარსებულია მიწასთან დაკავშირებული რელიგიური, რაციონალური და ემოციური სანყისებით. ყოველივე ამან განაპირობა ქართველთა განსხვავებული ჩვევები, სურვილები და მისწრაფებები პრაქტიკულ ცხოვრებაში, რაც მიწასთან მარადიული ურთიერთობის თავისებურებებიდან გამომდინარეობს [1].

* * *

დღეს საქართველოში არის და საზოგადოებრივ ასპარეზზე მოღვაწეობს იმგვარ ადამიანთა ძალიან მრავალრიცხოვანი „კო-

1 საქართველო თავისი ღრმა ქრისტიანული კულტურის, თავისი ფეოდალური ისტორიის (ხოლო მთაში – ე.წ. „სამხედრო დემოკრატიის“ ანუ თემობაზე დამყარებული ისტორიის) წყალობით ტიპოლოგიურად დასავლური ქვეყანაა, თავისი მთელი ისტორიის მანძილზე სწორედ დასავლეთთან კავშირისკენ მოსწრაფე.

2 სოფელი და სასოფლო-სამეურნეო წარმოება ეროვნული იდენტურობისა და კულტურული მემკვიდრეობის მნიშვნელოვანი ელემენტია. ფსიქოლოგიურად და კულტურულად სოფელი და ლონიერი გლეხკაცი ერის თვითმყოფადობის (ვინაობისა და რაობის) შენარჩუნების ერთ-ერთი მძლავრი იარაღია.

ჰორტა”, რომელნიც თავისი აზროვნების წესითა და ღირებულებრივი ორიენტაციით, ღრმა პროვინციალნი არიან (ასევე, თავისი პროფესიული და სოციალური ქცევითაც). სახელდობრ, აზრად არ მოსდით და არ წარმოუდგენიათ, რომ თვითონ ჰმართებთ და, რაც მთავარია, შეუძლიათ მონაწილეობა იმ ნორმათა შემუშავებასა და დადგენაში, რომელთა მიხედვითაც ცხოვრება უწევთ თვითონ მათ, მათ ოჯახებსა და მათ საზოგადოებას. მათ იციან მხოლოდ ერთი რამ: ნორმები მზა სახით შემოდის, როგორც იმპორტული საქონელი, დღეს საქართველოზე უკეთ განვითარებული ეკონომიკურად და სოციალურად უფრო ძლიერი და სოციალური სტრუქტურით უფრო ორგანიზებული ქვეყნებიდან, და პირადად მათ, მათ ნაცნობთა წრეს და მათ საზოგადოებას მთლიანობაში, ამ ნორმათა შესახებ – მათი ავკარგიანობის, მათი შესაძლო სრულყოფის, მათ შორის არჩევანისა და მათში კორექტივების შესახებ – ფიქრი არც მოეთხოვებათ, არც შეუძლიათ და არც სათანადო უფლება აქვთ. სოფელზე მათი შეხედულება მარტივია და ერთი ფრაზით გამოხატვადი: სოფელი ქვეყნის ყველაზე ჩამორჩენილი ნაწილია. მისი მოსახლეობა რაღაცა საშუალოა რობოტებსა და საქონელს შორის. სოფლის მეურნეობაში ჩაბმული მოსახლეობის პროპორცია უნდა დავიდეს (და, თუ განვითარება სათანადო სისწრაფით მოხდება, დავა კიდევ) 3%-ზე, როგორც ყველაზე განვითარებულ ქვეყნებშია, ხოლო დანარჩენი მოსახლეობა სად წავა, ეს საინტერესო აღარ არის. ჯანდაბამდის გზა ჰქონია! ეს არის ბალასტი, რომელიც ისტორიამ უკვე განირა“. მათი ამ გონებრივი დაღტონიზმის წყარო მხოლოდ ის არ არის, რომ ეროვნულ შეგნებამდე განვითარებულნი არ არიან. მათი ხსენებული დეფექტის ეტიმოლოგიის არსებითი ელემენტია ისიც, რომ კაცობრიობის სოციოლოგიის ევოლუციის, ანუ ადამიანთა არაფორმალური ურთიერთობების მექანიზმთა ევოლუციის პროცესში მთავარი ტენდენციის დასანახავად საჭირო ალღო არ ჰყოფნით. მოღვაწეთა ეს სახეობა, რომელიც ფართო მასამ უკვე „გრანტიჭამიების“ არც თუ საპატიო ტიტულით აღბეჭდა, ყველა ჰუმანიტარული არგუმენტაციისადმი, რომელიც მათ პოზიციის საწინააღმდეგოდ ქვეყნის (და მსოფლიოს) ინტელექტუალურ ელიტას გააჩნია, ყრუა და მუდამ ყრუდ დარჩება. ამიტომ, იძულებულნი ვართ, მათი ზემოხსენებული პირმინდად ანტიმეც-

ნიერული, უკაცრავად პასუხია, „კონცეფცია“ ამ ანტიმეცნიერულობაში ვამხილოთ ჰუმანიტარული კატეგორიების გვერდის ავლით, მათი უმეცრების საილუსტრაციოდ წარმოვადგინოთ პირწმინდად ობიექტივისტური არგუმენტაცია, რომელსაც შეხება არა აქვს ჰუმანიტარულ (ამ რიცხვში – აგრეთვე მორალურ) სფეროსთან და მხოლოდ სოციალური, ეკონომიკური, სოციოლოგიური, სტატისტიკური და სხვა ამდენადვე „უხეში“ ფაქტებით ოპერირებს. სახელდობრ ამ გონებით უმნიფრებსა და მათს ტლუ აუდიტორიას უნდა ვაჩვენოთ, რომ „სოფელი“ არის სავსებით გარკვეული ეკონომიკური, სოციალური, გეოგრაფიული, პოლიტოლოგიური და იურიდიული ცნება და ამ ცნებით აღნიშნულ ობიექტს თავისი არსებობისა და ფუნქციონირების სავსებით ობიექტურად შემეცნებადი კანონები აქვს. სახელდობრ, სოფელი რომ არც რუდემენტია კუდუსუნივით და არც ბალასტი, არამედ მას თანამედროვე საზოგადოებაშიც და განჭვრეტად მომავალშიც თავისი ჩაუნაცვლებადი როლი და ფუნქცია გააჩნია.

თქმულის საილუსტრაციოდ, ჩვენი აზრით, შემდეგი „უხეში“ ფაქტობრივი გარემოებები კმარა.

სოფელი ეროვნული კულტურის ძირითადი შემოქმედი, განმაახლებელი და მცველია

სოფელი არის სტაბილური მოსახლეობა (დღევანდელი საქართველოს პირობებში – რამდენიმე ათეული კომლიდან რამდენიმე ათას კომლამდე) და მისი სახლობის ტერიტორია,¹ რომელიც ამა თუ იმ იურიდიული ფორმით მას **ეკუთვნის**. მოსახლეობის როტაცია სოფლიდან სოფელში, საქართველოსა და მსოფლიოს პრაქტიკის მიხედვით, სოფლის ყოველდღიური ცხოვრების წესში არ იგულისხმება (ამსოფლელები ძირითადად ისევ ამსოფლელებად რჩებიან) [2]. სოციოლოგიური ფაქტია (და, ამდენად, ობიექტური

1 სოფელი, პირველყოვლისა, არის სახლობის ერთეული და არა მეურნეობისა. სოფლის განვითარების ძირითადი მიზანია სოფლის მოსახლეობის ყოფითი (სოციალურ-კულტურული) სტატუსის მიახლოებით გათანაბრება ქალაქის მოსახლეობის სტატუსთან, რასაც სოფლად ადამიანთა რესურსების შენარჩუნება-განვითარებისთვის და ამგვარად, სოფლის მეურნეობისა და აგროსასურსათო წარმოების გაფართოებული აღწარმოებისთვის გადამწყვეტი მნიშვნელობა აქვს

მეცნიერული განხილვის საგანია) ის, რომ სადღესოდ საქართველოშიც და, ზოგადად, მსოფლიოშიც ადამიანისათვის დამახასიათებელი ე.წ. შიგა-ჯგუფების (in-groups), ანუ ჩვენ-ჯგუფების (we-groups) რიცხვში „ოჯახის წევრებია“, „ნათესავების“, „მეზობლების“, „თანამემამულეებისა“ და სხვა ბუნებრივი შიგა-ჯგუფების პარალელურად, „თანასოფლელთა“ სახით, კიდევ ერთი დამატებითი სიბოძის გამომცემი „შინაურობის“ კერა ღვივის. ის, თუ როგორ „ღვივის“ ეს „კერა“, მეცნიერების საგანი არ არის, იგი უფრო პოეზიის საგანია. მაგრამ ფსიქოლოგიური ფაქტი, რომ იგი ღვივის, მით უმეტეს, სტატისტიკა, რომ იგი მოსახლეობის **უმრავლესობის** გულში ღვივის, დიახაჲ მეცნიერებისათვის არსებითი ფაქტია, მაშასადამე – ყოველგვარი ანალიზისა, პროგნოზისა და დაგეგმვისათვის არსებითი მნიშვნელობის ფაქტი.

ჯამურად, სოფლის როგორც გეოგრაფიული, სამეურნეო, სოციალური, სტრატეგიული და ფსიქოლოგიურ-ეგზისტენციალური ერთეულის, დღევანდელი ფუნქციონის ანალიზისა და მომავალი ფუნქციონის პროგნოზის თვალსაზრისით გასათვალისწინებელ (უფრო მეტიც: ამოსავალ) ფაქტთა შორის დავასახელებთ შემდეგს:

1. თანასოფლელებს საკუთარი სოფლის ხილული ბუნებრივი რესურსების უკეთესი ცოდნა აქვთ, ვიდრე ვისმე სხვას. შესაბამისად, მათ შეუძლიათ ამ რესურსების გამოყენება უფრო სრულად, ვიდრე ვისმე სხვას. ფიგურალურად რომ ვთქვათ, მათ შეუძლიათ სახნავი მიწის არც ერთი მეტრი მოუხნავი არ დატოვონ. სხვა პარამეტრია მიწის გამოყენების ინტენსივობის ხარისხი: შესაძლებელია, სოფელი ისე ხარისხიანად ვერ ხნავდეს მიწას, როგორც ამას იზამს გიგანტური სასოფლო-სამეურნეო კომპანია. სოფელს შეუძლია, თავისი შეძლებისდაგვარად, ამაღლოს და ამაღლოს მოხვნის ხარისხი თანამედროვე მსოფლიო სტანდარტებამდე. როდის რა წარმატების მიღწევა ძალუძს სოფელს ამ პროგრესში, გათვლადია. სასოფლო-სამეურნეო წარმოების ამ ორ პარამეტრს შორის – რესურსის სრულად ათვისებასა და მის ინტენსიურად ათვისებას შორის – წინააღმდეგობა არ არის. ამიტომ შედეგის გათვლა, ჯამური პროდუქციის თვალსაზრისით, პრინციპში, შესაძლებელია ყველა შემთხვევაში.

2. სოფლელებს თავისი სოფლის სტაბილურ მოხმარებაში მყო-

ფი ტერიტორიისადმი – ამა თუ იმ ზომითა და ამა თუ იმ ფორმით – მისი **საკუთრობის** ცნობიერება და განცდა აქვთ. ამ განცდას ინახავს და კვებავს მინაზე ინდივიდის (და კომლის) „საკუთრობის“ – გამორჩეული ექსკლუზიური უფლების – ორივე ფორმა – ინდივიდუალურიც და კოლექტიურიც (ვენახი ჩემი საკუთრებაა, საძოვარი – საერთო და ა.შ.). ორსავე შემთხვევაში ამსოფლელს მის მიმართ ის უფლება აქვს, რომელიც არა აქვს „ვილაცას“, შემთხვევით პირს. შესაბამისად, სოფლელს არა მხოლოდ თავისი, არამედ სოფლის მთელი რესურსისადმი გაფრთხილების (მისი არგაფუჭებისა და არგანიავენის) ცნობიერება და განცდა აქვს. ორსავე შემთხვევაში მე, აქაურს, მის მიმართ ის უფლება მაქვს, რომელიც არა აქვს ვილაცას, შემთხვევით პირს. შესაბამისად, სოფელი არ გაუწევს მტაცებლურ ექსპლუატაციას თავისი სოფლის ტყეს, არ მოუნდომებს განამენიანებას საძოვარს და არ გააუქმებს სოფლის რომელსამე წყაროს, თუნდაც მრავალთა შორის [3].

3. სოფლის მოსახლეები არიან უშუალო მკვიდრნი თავისი სამუშაო ობიექტისა – მიწისა – და, ამავე დროს, თავისი შრომის ნაყოფის ნატურალური სახით მომხმარებელი, ანუ ისინი ცხოვრობენ იმ გარანტიის ცნობიერებითა და განცდით, რომ მათი სრული მონყვეტა საკვები კალორიებისაგან ვერ მოხდება ვერანაირი საზოგადოებრივი, თუნდაც საერთაშორისო კატაკლიზმების შემთხვევაში (მათ ვერ განყვეტს ვერც შიმშილი, ვერც ინფლაცია, ვერც ძლიერი სანარმოო კონკურენტის გამოჩენა და ა.შ.).¹ ურბან-იზებულ მოსახლეობას (მით უმეტეს, არა ურბანულ პირობებში შობილსა და გაზრდილს) ეს განცდა ვერ ექნება, რადგან ამ მეორე შემთხვევაში ეს განცდა ობიექტური კი არა მაცდური იქნება [4].

ურბანულ მოსახლეობას შიმშილით და წყურვილით განყვეტა

1 მიწა ერისთვის მისი ყოფიერების ტერიტორიაა, ფიზიკურადაც და ფსიქიკურადაც. იგი სასიცოცხლოდ აუცილებელი ბაზაა, რომელიც არსებითად განსაზღვრავს ქვეყნის ყოველმხრივი დამოუკიდებლობის ხარისხს და ფაქტობრივად წარმოადგენს მოცემულ სივრცეში ერის სულისდგმისა და შემოქმედების აუცილებელ პირობას. მიწისაგან გლეხკაცის მონყვეტა გამოიწვევს არა მარტო მისი, როგორც მენარმე ინდივიდის, მოსპობას, არამედ, რაც უფრო მნიშვნელოვანია, სოფლის, როგორც ეროვნული კულტურის საძირკვლის, ყოფაცხოვრების წესის შემოქმედის, შემნახველისა და განმაახლებლის, ფუნქციის მოშლასაც.

ემუქრება პირველსავე შემთხვევაში, როცა რაღაცა კატასტროფის მასშტაბი გადააჭარბებს შესაძლებელი ჰუმანიტარული დახმარების მასშტაბს. ამ საშიშროებისაგან (დროებით) ჯერ-ჯერობით დაცულნი არიან მხოლოდ ძალიან ძლიერი სახელმწიფოები, რომელთაც უახლოეს მომავალში სამხედრო წარუმატებულობა და დარტყმით გამოწვეული ჰუმანიტარული კატასტროფა არ ელით.

სოფლის მოსახლეობა არის თანამედროვე ქვეყანაში ერთადერთი სოციალური ფენა, რომელსაც აქვს:

ა) თავისი, როგორც (გარკვეულ ფარგლებში) თვითკმარი და, ამგვარად, მოუსპობადი სოციალური ფენის ელემენტის განცდა და ცნობიერება, ერთი მხრივ, და თავისი ამ შესაშური სტატუსიდან თავისი ვერავის მიერ ვერ ჩამოგდებადობის ცნობიერება და განცდა, მეორე მხრივ. შესაბამისად, მათ აქვთ იმის ცნობიერებაც და განცდაც, რომ ისინი მოცემული ერის ყველა სხვა ფენაზე უფრო სტაბილური და გადარჩენისუნარიანი ნაწილი – მისი „ხერხემალი“ არიან. საქართველოში დღეს და განჭვრეტად მომავალში ამგვარი ცნობიერების მატარებლები მხოლოდ სოფლელები არიან. სხვა ალტერნატივა (ანუ ანალოგიური ცნობიერების მატარებელი სხვა ფენა) მოაზრებადია, მაგრამ კონკრეტულად საქართველოში – ჯერ ვერა. ესაა იმგვარი მეცნიერულ-ტექნიკური, მკაფიოდ გამორჩეული პროფესიული ელიტა, რომელსაც უყვედრებელი და უკონკურენციო თავდამკვიდრების უჭოჭმანო იმედი შეიძლება ჰქონდეს ნებისმიერ ქვეყანასა და საზოგადოებაში. ასეთი ზეგანვითარებული პროფესიული ელიტები დღეს არიან ზეგანვითარებული ქვეყნების მეცნიერულ-ტექნიკური ზედაფენები. მცირეთაგან ასეთი ელიტა დღეს შეიძლება არსებობდეს მხოლოდ ებრაელებში. მიუხედავად ამისა, ებრაელებმა მაინც კოლოსალური ძალისხმევა გაიღეს თავის ტერიტორიის ველ-მინდორზე გაშლილი, სასოფლო-სამეურნეო მოსახლეობით დაკომპლექტებული სახელმწიფოს შესაქმნელად ისრაელის სახით, და არა პირწმინდად ურბანულისა.

4. სოფლის მკვიდრ („მამაპაპურ“) მოსახლეს თავის სოფელში, ნებისმიერ სხვასთან შედარებით, წინასწარი უპირატესობის განცდა აქვს. ეს უპირატესობაა ის, რომ მას აქვს სახლ-კარი, რომელშიც

ვერავენ შეედავება (ახალმისულს, რაგინდარა წარმატებულსა და მდიდარს, შეიძლება შეედავონ „შენი ნაქურდალი ფულით რომ მოხვედი და ჩაგვისახლდი, ეგრე კი არ არის მართლა! ცოტა ხმას დაუწიე და ისე გველაპარაკე!“ სოფელს მყარი იმედი აქვს, რომ მას ასეთი საყვედურით ვერავინ მიმართავს. ამიტომ, სოფლის მოსახლეობა უფრო ერთგულია თავისი სამკვიდროს დაცვაში, ვიდრე ამავე ტერიტორიის დაცვაში ამავე ქვეყნისა და ერის სხვა შვილები, რომლებიც ამსოფლელები არ არიან. თუ არა ამსოფლე-ლი (აქაური არამკვიდრის, გუშინნინ აქ სახლნაყიდი და ნახევარ-მოაგარაკესაგან განსხვავებით), ცხრაჯერ დაფიქრდება, ვიდრე აიყრებოდეს და თავის სახლ-კარს გადამთიელს, დაუტოვებდეს, აქაური გლეხი¹ ამისათვის ათჯერ მაინც დაფიქრდება.

5. ვერც ადგილობრივი წარმომადგენლობითი არჩევითი ორგანოების მიერ, ვერც სამართალდამცავის მიერ და ვერც განათლების სისტემის მიერ კონკრეტული ტერიტორიის სამეურნეო, ადმინისტრაციული და იდეოლოგიური მართვის ამოცანა ვერ გაექცევა შესაბამისი დასახლების, როგორც ვაზი-მარადიულის, თვითმართვის შინაგანი პოტენციალის ოპტიმალური გამოყენების ამოცანას. უმისოდ მართვა შინაარსობრივად უკმარისი იქნება. სახელდობრ, კანონმდებლობა ვერ მოიცავს ყველა შესაძლო ტიპურ სიტუაციას, განათლების გზით გავრცელებული მორალური პროპაგანდა ვერ შეიმუშავებს აზრს ყველა სახის შესაძლებელ პრობლემაზე (ოჯახური, პირადურთიერთობლივი, სოციალურ თვითდამკვიდრებასთან დაკავშირებული და ა.შ.). ყველა ადეკვატური მართვა მოცემული ტერიტორიის მიმართ მოიცავს (და გულისხმობს) მეტ-ნაკლებად ტრადიციული სოციალური და, საერთოდ, პიროვნული ურთიერთობების ასე თუ ისე გაზიარებული საერთო კონცეფციების ქონას, ერთი მხრივ, და ავტორიტეტული არაოფიციალური საზოგადოებრივი აზრის ქონას, მეორე მხრივ.

1 გლეხკაცი, ძალიან ხშირად, უბრალოდ, სოფლის მეურნეობის პროდუქციის მწარმოებლად მიაჩნიათ, თუმცა, მისი როლი სცილდება ამ ჩარჩოებს. სინამდვილეში ის აუცილებელია სოფლისთვის, უფრო მეტიც, გლეხკაცი სოფლის მაცოცხლებელი და გარდამქნელია. სიტყვა „გლეხი“ სინონიმი არაა არც „არანასწავლის“, არც „ტლუსი“, არც „დაბალი ლობისა“. იგი სინონიმი „ქვეყნის პირველი ნომერი მარჩენალისა“, „საკუთარ ფეხზე მდგომისა“, „ერის ფესვისა და რეზერვისა“.

სოფელში ბუნებრივად მიმდინარეობს არაფორმალური ზნეობრივი და ინტელექტუალური ელიტის გამორჩევისა და აღიარების პროცესი. ვინ არიან ისინი, რომელთაც (არაფორმალურად) „ჭკუა ეკითხებათ“, სოფელმა, როგორც წესი, იცის ხოლმე (მზარდი ქალაქის ახალმა მიკრორაიონმა, ბუნებრივია, ეს არ იცის).

– მუდმივმოქმედი საზოგადოებრივი აზრი, რომელიც ხსენებულ მიკრორაიონს ვერ ექნება, და ამგვარად, როგორც წესი, სოფელს სჭირდება;

– ადგილობრივად ნდობამინიჭებული და ხმამაცებული ადგილობრივი მამასახლისი.

მსგავსი რამ ქალაქის მიკრორაიონსაც სჭირდება, მაგრამ, ბუნებრივია, არ მოეპოვება. ის, რომ ახალი მიკრორაიონები ამ მხრივ უზრუნველყოფილი არ არიან, ზოგადეროვნულ კატასტროფას არ ქმნის: რაოდენობრივი თვალსაზრისით ქვეყნის საზოგადოებრიობა, მთლიან მასშტაბით, ამ პრობლემებს **ერევა**. მაგრამ, თუ სოფელი მოიშალა, ანუ მთელი სივრცე ქვეყნის ამ მიკრორაიონის მდგომარეობაში აღმოჩნდა, ეს იმას ნიშნავს, რომ საქართველოში არ იარსებებს აღარც არაოფიციალური და ტელევიზიის მიერ მაყურებლისათვის არა თავს მოხვეული ნამდვილი საზოგადოებრივი აზრი, აღარც ახალდასახლებულ ერთეულთა რეალური თვითმართვა. კონკრეტულად, ეს ფაქტობრივად ნიშნავს საზოგადოების იდეოლოგიურ იმპოტენციას, ჯოგად ქცევას. **ჯოგს კი საზოგადოებათა** კონტექსტით (ანუ კაცობრიობაში) გადარჩენის ნულოვანი შანსი აქვს (ცნობისათვის: ამერიკელი სოციოლოგებისათვის ჯერ კიდევ ამ ორმოცი წლის წინ ცნობილი იყო მეტ-ნაკლებად ახალშექმნილ კოლექტივშიც და ძველშიც რეალური ლიდერების გამოვლენის მეთოდიკა. ჰკითხავდნენ – ყველას „დამისახელე სწრაფად, ვინც მოგაგონდება, ათი კაცი ამ კოლექტივიდან, სანარმოოდან და ა.შ.. ვინც ყველაზე მეტისაგან დასახელდებოდა, ის ჩაითვლებოდა ლიდერად. ცდომილება, ამა თუ იმ დამატებითი ფაქტორების გამო, მცირე იყო. ამგვარი კვლევის ჩატარება დამქირავებლის შეკვეთით ერთ-ერთ დაუშვებელ ქმედებად იყო მიჩნეული სოციოლოგთა პროფესიული ეთიკის მიერ).

სავსებით პრაქტიკული გათვლაა: თუ საქართველოს ადამიანისეული პოტენციალის აქტივობა ჩვენი ჩამონათვალის 1-5

პუნქტებში თითო პარამეტრში თუნდ მხოლოდ 10%-ით შემცირდება, ეს იმას ნიშნავს, რომ სოფლურ სივრცეში მოქცეული ჩვენი მოსახლეობის პოტენციური ქვეყნისა და სახელმწიფოსთვის ყველაზე სასიცოცხლოდ მნიშვნელოვან ამ პარამეტრებში გამოიყენება მხოლოდ ორ მესამედზე ნაკლებად. პარალიზაციის ამ ხარისხს დედამიწის ვერც ერთი ერი (და, საერთოდ, ვერც ერთი მოსახლეობა), სხვა თავის მსგავსებთან მუდმივ მეტოქეობასა და არსებობისათვის ბრძოლაში ჩართული, ვერ გაუძლებს....

ამ პირობიდან პრაქტიკული მხარეების გარდა, ჩვენს თემას ჰუმანიტარული, კერძოდ, ფსიქოლოგიური მხარეც აქვს. მთლიანად მოსახლეობის ქცევას პროლეტარად, ანუ საკუთარი მუშა ძალის გაქირავებით მაცხოვრებელ პირად (შავი მუშიდან დაწყებული, ქვეყნისა და აკადემიის პრეზიდენტებით დამთავრებული) გარდუვალად ახლავს მთლიანად ამ კონკრეტული საზოგადოებისა და მთლიანად მისი ესტაბლიშმენტის სიმყიფის პანიკოგენური განცდა, რაც საზოგადოების ფსიქიკური ქმედუნარობის საფრთხეს უქმნის. ზეგანვითარებულ ქვეყნებში ესეც არ ხდება მხოლოდ იმიტომ, რომ **ჯერჯერობით** ამ ქვეყნებს სხვათაგან დამარცხებისაგან დაცულობის სრული რწმენა აქვთ. თუ საგარეო კონფლიქტში წარუმატებლობის გამო ეს რწმენა შეირყა, ამ რწმენის შეუქცევადი დაქვეითება დაიწყება. ფსიქიკური წონასწორობა, რომელიც ასეთ შემთხვევაში კითხვის ქვეშ დადგება, ე.წ. არამყარ წონასწორობათა რიცხვს ეკუთვნის (წვერზე დაყენებული ფანქრის წონასწორობა და არა, პირიქით, ძაფზე ჩამოკიდებული ბურთულასი). თუ სიტუაცია **ამ** მიმართულებით ვითარდება, მაშინ დემოკრატიული წესით მოწყობილი, პროლეტარებად ქცეული საზოგადოება, თავისი რეალური ხმისმიცემის მთავარ გადამწყვეტ აქტს – გადამწყვეტილებას სახელმწიფოებრივი და საზოგადოებრივი გადარჩენისათვის ბრძოლის შესახებ ან, პირიქით, კაპიტულაციის შესახებ, – როგორც იტყვიან, ფეხებით მოახდენს და არა ბიულეტენით: იგი გაიქცევა საფრთხის ზონიდან და თავისი ახალი არსებობის დაწყებას შეეცდება სადმე სხვაგან – რა თქმა უნდა, მისთვის ცხოვრების ნაკლები ხარისხის მქადებელ, მაგრამ შედარებით უსაფრთხო ზონაში.

მოკლედ უნდა შევხებო ჩვენი თემის ჰუმანიტარული მხარის

ერთ დეტალსაც. „სოფლური“ ცნობიერების პლუსი, რომელიც ვახსენეთ, ქმნის მძლავრ მოტივაციას არა მხოლოდ ეროვნული პესიმიზმისაგან დასაცავად, არამედ ზოგადეროვნული მიზნებისადმი აქტიური დამოკიდებულებისთვისაც საერთოდ.

ამის გათვალისწინება აუცილებელია, როცა ვმსჯელობთ ფსიქოლოგიისა და სოციოლოგიის ისეთ ფუნდამენტურ თემაზე, როგორიცაა ადამიანთათვის მათი არსებობის **აზრის** თემა. ჰომო საპიენსისათვის სიცოცხლის განცდის მიუცილებელი ნაწილია **თავისი თავდამკვიდრების** განცდა. თავდამკვიდრების ამ განცდის ფონი არაა უსულო ბუნება. **თავდამკვიდრება ხდება სხვა ადამიანთა ფონზე**. ადამიანს, როგორც საზოგადოებრივ არსებას („ძოონ პოლიტიკონ“. არისტოტელე) **სჭირდება ზეინდივიდუალური, ჯგუფური** („შიგაჯგუფური“) თავდამკვიდრებაც:

- მსოფლიოს მთლიანი პოლიტიკური სისტემის ფონზე და
- წარსული და მომავალი ისტორიის ფონზე.

ამგვარი თავდამკვიდრებისათვის ერს, როგორც შიგა-ჯგუფს, ვერც ერთი სხვა შიგაჯგუფი ვერ ჩაენაცვლება (მუსლიმანებში მიღებული წამყვანი თვითიდენტიფიკაცია კონფესიური ხაზით, სავარაუდოა, გადამწყვეტწილად დათმობს თავის პოზიციებს ეროვნულის სასარგებლოდ ცნობიერების მნიშვნელოვანწილად სეკულარიზაციის გარდუვალად მიმდინარე პროცესის კონტექსტით). რაც შეეხება სოფლის როგორც ტერიტორიული და სოციალური ერთეულის როლს ერის [5], როგორც ასეთის პერსპექტივის განსაზღვრაში, იგი, ვფიქრობ, ახსნას არ საჭიროებს.

საქართველო, როგორც დედამიწის ნაწილი, ეკუთვნის ქართველ ერს, როგორც კაცობრიობის ნაწილს. ქართველ ერში შედის საქართველოს ყველა მოქალაქე. საქართველოს სახელმწიფოს შეუვალი მოვალეობაა უზრუნველყოს:

1. თავის მოქალაქეებისათვის სიცოცხლე (გამოკვება და უსაფრთხოება)
2. გარე ძალებისაგან დამოუკიდებლობა (საკუთარი თავის, მართვა საკუთარი ინტერესებიდან გამომდინარე, თავდაცვის უნარი შესაძლო თავდასხმებისაგან)
3. პიროვნების, როგორც გონიერი და თავისუფალი სუბიექტის ბუნებრივ უფლებათა დაცვა იმ საზღვრებში, რომელშიც

ამას მოითხოვს სახელმწიფოს ზემოხსენებული ორი მოვალეობა.

4. უზრუნველყოს თავისი ერისა და სახელმწიფოს ზემოხსენებული ინტერესების დაცულობა უსასრულო მომავალში.

დასკვნის მაგიერ

ადამიანი ღვთის ქმნილებათა გვირგვინია, სამყაროს მწვერვალია. ამას გვეუბნება ჩვენი სარწმუნოება და ამასვე გვეუბნება მეცნიერება. ადამიანი ვერ განიხილება, როგორც სამუალება რაღაც მიზნისთვის – იგი უნდა განვიხილოთ მხოლოდ, როგორც მიზანი. ეს არის ყოველივე მორალის პირველი საფუძველი (იმ. კანტი). გლეხის მოწოდება და დანიშნულება არ არის მხოლოდ ის, რომ მოხნას, დაბაროს, გასხლას, მოუაროს პირუტყვს, მოიყვანოს ხორბალი, მწვანელი, ხილი და ყურძენი. მისი პირველი დანიშნულება და მოწოდებაა ის, რომ იყოს – იყოს, როგორც ღირსეული, ჯანსაღი, ყოველმხრივ გამართული ადამიანი, შვილების გამზრდელი და საზოგადოების გამომკვებავი. ქართველი გლეხკაცის მოწოდებაა, იყოს ქართველი ბავშვების გამზრდელი, ქართველი ერის ხერხემალი, საქართველოს დემოგრაფიის დამცველი, მისთვის ოფლისა და სისხლის დამღვრელი (ისევე, როგორც ყველა სხვა მოქალაქე) და საქართველოს მიწის ყოველი ცალკეული გოჯის შემნახავი. საქართველოს დიდ პატრიოტ პოეტს ჯერ კიდევ სამასი წლის წინ აქვს ნათქვამი საქართველოს თავზე ამოვარდნილი მძიმე ქართველების ეპოქაში: „ოდეს ნახდა გლეხიკაცი, საქართველო დაძაბუნდა“.

ვისაც დღეს საქართველოს ეკონომიკის დაგეგმვა და წარმართვა ავალია, ამის დავინყების უფლება არ აქვს. გლეხკაცი არის (და ყოველთვის იქნება, თუ მცდარმა ან დანაშაულებრივმა პოლიტიკამ არ შეუშალა):

- სოფლის, როგორც საზოგადოებისა, ერისა და ეკონომიკური ფუძე-ერთეულის, მოსახლე და შემნახავი;

- (სასაზღვრო ზონებში) ტერიტორიის გულით მონდომებული დამცველი;

- ნატურალური პროდუქციის ხარისხსა და რაოდენობაში გულწრფელად დაინტერესებული მეურნე;

- შთამომავლობის მრავალრიცხოვნებასა და მაღალხარისხოვან აღზრდაში დაინტერესებული მეოჯახე;

- ქვეყნის კეთილდღეობასა და ძლიერებაში ასევე გულწრფელად დაინტერესებული მოქალაქე.

ამისათვის მას სჭირდება:

- თავისი ოჯახის სავსებით დამაკმაყოფილებელი უზრუნველყოფა;

- ურბანულთან მაქსიმალურად მიახლოებული ცივილიზაციური კომფორტი;

- ურბანულთან მიახლოებული განათლების საშუალება ბავშვებისათვის;

- გონივრული ხარისხი დამოუკიდებლობისა ეკონომიკურ პარტნიორებთან საქმიან ურთიერთობაში (ღვინის ქარხანასთან, საკონსერვო ქარხანასთან, მექანიზაციით მომსახურების ფირმასთან, სანგავით მოვაჭრესთან, ჩაის ფაბრიკასთან, რძის შემგროვებელ და გადამამუშავებელ საწარმოსთან, ხორცკომბინატთან, პირუტყვის სასაკლაოსთან, ლოგისტიკურ ცენტრთან, საცავ-მაცივართან და ა.შ.);

- თავისი შთამომავლობისათვის ფართო (გეოგრაფიულად და სოციალურად) პერსპექტივის იმედი.

ფოკუსირება ზემოთქმულიდან გამომდინარე, აუცილებელი იქნება საქართველოს კანონის „სოფლის შესახებ“ მიღება, **სოფლისთვის სამართალსუბიექტის სტატუსის და სოფლად სათემო საკუთრების აღდგენა.**

სახელმწიფომ აკადემიურ სექტორთან თანამშრომლობით უნდა უზრუნველყოს სასოფლო დასახლებათა ინსტიტუციონალური და ინფრასტრუქტურული მოწყობა და სასოფლო-სამეურნეო საწარმოო (აგროწარმოება) ზონების კომპლექსური განვითარება მოდელით: **სოფლის განვითარება ემყარება სოფლის მეურნეობის განვითარებას.** უნდა შეიმუშაოს სასურსათო უსაფრთხოების უზრუნველყოფელი სოფლის მეურნეობის დარგობრივი სტრუქტურა, **განსაზღვროს** სოფლის, როგორც ტერიტორიული ერთეულის განვითარების სტრატეგია და **შეიმუშაოს სოფლისა და სოფლის მეურნეობის** სისტემური განვითარების სამოქმედო გეგმა.

ისტორიულად, სამშობლოს დაცვით ქართველი გლეხკაცი თავის პირად მამაპაპურსაც, თავის „მამულსაც“ იცავდა. სხვა სიტყვით: თავის პირად მამულს იგი თავისი დიდი მამულის – თავისი სახელმწიფოს – დაცვის სახით იცავდა – და იცავს. ეს ბუნებისა და საზოგადოების ურყევე კანონია. ეს ფსიქოლოგიური კანონზომიერება მარადიულია.

გამოყენებული ლიტერატურა:

1. პ. კოლუაშვილი, ილია ჭავჭავაძე, მეურნის თვალთ, „მერიდიანი“ თბ. 2013 წ.
2. პ. კოლუაშვილი, რა უნდა გავიზიაროთ ამერიკული გამოცდილებიდან. „ეკონომიკა და ბიზნესი“, 19-38გვ. №1, 2015წ.
3. პ. კოლუაშვილი, გადავაქციოთ ყოველი სოფელი მწარმოებელ ბრენდად. „ეკონომიკა“, №1-2, 2015წ.
4. პ. კოლუაშვილი, დ. ზარდიაშვილი, მიწის საკითხი ანუ ბედი ამა ქვეყნისა, „ახალი აგრარული საქართველო“, №6(62), 2016 წ.
5. პ. კოლუაშვილი, დ. ზარდიაშვილი, ქართული სოფლის სტატუსის შესახებ, „ახალი აგრარული საქართველო“, №5, 2015 წ.

REFERENCES:

1. P. Koguashvili, I. Chavchavadze. In Farmer's View. "Meridiani", Tb. 2013y. (in Georgian Language).
2. P. Koguashvili. What should we share from American Experience. "Economics and Business", #1, 2015 y. (in Georgian Language).
3. P. Koguashvili. To Turn the Village into a Production Brand. Journal "Economics", #1-2, 2015 y. (in Georgian Language).
4. P. Koguashvili, D. Zardiashvili. The Issues of Land and the Destiny of this Country "New Agrarian Georgia", #6(62), 2016 y. (in Georgian Language).
5. P. Koguashvili, D. Zardiashvili. About the Status of Georgian Village". "New Agrarian Georgia", #5, 2015 y. (in Georgian Language).

THE GEORGIAN VILLAGE IS ETERNAL

Paata Koguashvili

Full Member of Georgian
Academy of Agrarian Sciences

In the present article, the author makes clear that Georgian village “is a small, but formed organic part of one of the civilizations” (academician Nicholas Marr) – Georgian life, integrity of eternal values, and a rather definite economic, social, geographical, politological and legal concept; the village has the objectively cognizable laws of its existence and functioning, and it has its own indispensable role and function in modern society and in the foreseeable future as well.

The author clearly justifies that “the banishment” of the village to the periphery of conscience and existence, its evaluative abjection, representation as a rudiment or ballast, should be considered as a mental daltonism; but sacrificing it for a false social and economic relevance, leaving it to an uncertain fate or entrusting it to the market – is an unforgivable crime.

The author clearly demonstrates that among the so-called in-groups or we-groups specific to people, there grows “the all my people” hearth in the persons of “co-villagers”, which radiates warmth, and which if ignored or worse, if going up against it, is an obvious crime; besides this value aspect, the author presents irrefutable facts of the present and future functioning of the village, such as: the co-villagers’ better knowledge about their own environment and natural resources, higher emotional experience of living in their own land and disposal of their own property, in comparison with any other social group, as a result of which it becomes clear that the rural population in the modern country is the only well-rounded social stratum, which is particularly “chained” to the settlement territory by its rights and obligations of its administering, and therefore, it is the backbone defining the country’s national-territorial identity.

Based on this, in the concluding part of the article, the author shows that existential threat that can arise as a result of incorrect evaluation of the role of village and its population, and consequently, as a results of the exodus of the rural population, depopulation of the countryside and its “proletarianization” caused by wrong policies.

Keywords: Village; Peasant; Village Habitant; Agriculture; Development; Government; Responsibilities.